

Tuzla, 05.03.2025.
Br. protokola: KP-I-55/25

CILJEVI I KRITERIJI ZA DODJELU GRANTOVA U OKVIRU FONDA ZA AKTIVNE ZAJEDNICE-

Fond za aktivne zajednice je otvoren u okviru Programa razvoja zajednice unutar kojeg razvijamo građanski aktivizam i podstičemo građane na uključivanje u razvoj zajednice. U okviru ovog programa posebno važan segment daje se organiziranju građana i mladih u ugroženim rubnim naseljima, čije ideje i inicijative za poboljšanje uslova življenja podržavamo kroz ovaj Fond.

CILJEVI FONDA

Osnovni cilj Fonda je unapređenje i razvoj aktivnih zajednica u Tuzlanskom kantonu, kroz sufinansiranje projekata i inicijativa aktivnih građana za rješavanje zajedničkih problema, uz maksimalno korištenje svih raspoloživih lokalnih resursa i promociju suradnje između javnog, civilnog i poslovnog sektora.

PODRUČJE DJELOVANJA

Program za aktivne zajednice Fondacija tuzlanske zajednice provodi se na području Tuzlanskog kantona.

KO MOŽE APLICIRATI?

Aplicirati mogu isključivo Lokalne grupe za razvoj zajednice, koje su aktivne članice Mreže aktivnih zajednica.

ŠTA PODRŽAVAMO?

Inovativne projekte iz različitih područja društvenog života koji odgovaraju na potrebe lokalne zajednice i kojim se direktno unapređuju uslovi življenja mladih. Shodno rezultatima istraživanja [Vitalni znaci 2019.](#), prednost dajemo projektima koji su usklađeni sa prioritarnim potrebama lokalnih zajednica u Tuzlanskom kantonu, te izazovima na globalnom nivou definisanim [UN Globalnim ciljevima održivog razvoja](#). U okviru ovog Fonda, želimo podržati projekte koji potiču inovativna međusektoralna partnerstva i koji će unaprijediti sljedeće oblasti življenja:

- ***Očuvanje prirode, briga o okolišu i klimi***

Želimo da podržimo inicijative koje su usmjerene na brigu o okolišu i koje podstiču odgovoran odnos prema prirodi, brinu o čistoći vode, zemlje i zraka. Dobrodošli su projekti za unapređenje kulture zdravog življenja kroz sprječavanje onečišćenja okoliša, recikliranja, održivog korištenja javnih površina i prirodnih resursa.

- ***Kvalitetno obrazovanje i cjeloživotno učenje***

Želimo da podržimo inicijative kojima se promovira cjeloživotno učenje i neformalno obrazovanje, ali i koje njeguju kulturu zajedništva i poštivanje različitosti. Dobrodošli su projekti edukativnog karaktera za usvajanje novih životnih vještina i znanja kod svih kategorija stanovništva, bez obzira na različitosti, npr.



opismenjavanje, učenje starih zanata, kućne radinosti, proširivanje znanja o njegovanju kulture različitosti, tradicije i slično.

- **Smanjenje nejednakosti i ljudska prava**

Želimo da podržimo organizacije i neformalne grupe koje aktivno rade na razvoju demokratskog društva, promovišu rodnu ravnopravnost, zajedništvo i društvenu koheziju. Dobrodošli su projekti zagovaranja i promocije ljudskih prava, rodne ravnopravnosti, prava manjina, prava ranjivih i marginaliziranih grupa, npr. javne kampanje, debate, okrugli stolovi, diskusije i druge aktivnosti usklađene sa potrebama navedenih grupa.

- **Ekonomija i poduzetništvo**

Inovativne projekte koji su usmjereni na razvoj poduzetničkog duha i projekte koji obezbjeđuju samoodrživost organizacijama civilnog društva. Projekte koji podstiču usvajanje vještina i kompetencija potrebnih na tržištu rada, koji su usmjereni na unapređenje rada organizacija civilnog društva i sl.

- **Očuvanje zdravlja, sport i rekreacija**

Podržavamo aktivnosti za mlade, djecu i porodicu, takmičenja i male turnire, između kvartova i lokalnih zajednica, promocije zdravog načina života i omasovljavanje rekreativnog sporta među djecom i mladima. Prednost će se dati inovativnim idejama koje će promovirati rekreativni sport, što **ne podrazumijeva** podršku trenažnom procesu profesionalnih sportskih klubova i njihovih omladinskih pogona.

- **Kultura, umjetnost i društveni život**

Podržavamo kulturna dešavanja, izložbe, festivale, koncerte, umjetničke predstave, tematske večeri i slično. Prednost će se dati inovativnim idejama što **ne podrazumijeva** godišnje koncerte niti obljetnice i proslave godišnjica.

- **Uređenje komunalne infrastrukture (oblast održive i aktivne zajednice)**

Projekti uređenja komunalne infrastrukture od značaja za lokalnu zajednicu kao što su akcije uređenja izvorišta, puteva, regulacije oborinskih voda, čišćenja korita potoka i rijeka, kanala i propusta, izgradnje ili renoviranja prelaza i sl.

- **Zagovaranje za promjene u smislu poboljšanja položaja građana a posebno marginaliziranih skupina u lokalnoj zajednici**

Projekti sa ciljem izgradnje zajedništva, razvoja demokratskog društva, jačanje osjećaja pripadnosti i lokalnog patriotizma, društvene kohezije, promocije volonterizma i aktivizma; projekte zagovaranja za rješavanje problema građana **a posebno marginaliziranih skupina**, zagovaranje i promociju ljudskih prava, dječijih prava, prava manjina, organizacije javnih debata, okruglih stolova, diskusija, i sl.

Projekti mogu biti i iz drugih oblasti, pri čemu prethodno navedene imaju prednost.

OPŠTI KRITERIJI

- Uslov za apliciranje je izrađen godišnji akcioni plan na nivou lokalne zajednice;
- U razmatranje će biti uzeti samo projekti koji odgovaraju na potrebu naznačenu u akcionom planu (procjena zajednice ne smije biti starija od dvije godine);
- Projekti treba da budu zasnovani na volonterskom angažmanu aplikanta i promociji međusektoralne saradnje;
- Vrijednost podrške po jednom projektu može biti u rasponu od **1000,00 KM do 3.000,00 KM**;
- Mogu trajati **od 1 mjesec do maksimalno 5 mjeseci** (početak projekta podrazumijeva datum potpisivanja ugovora, a projekat se završava kada se dostave završni narativni i finansijski izvještaji);
- Projekti treba da imaju dugoročan efekat u lokalnoj zajednici i dobru šansu da postanu samoodrživi i nakon završetka projekta;



- Lokalne grupe za razvoj moraju **odrediti nosioca projekta** (udruženje ili ustanova unutar LGZR koja je odgovorna za realizaciju projekta; nosioci ne mogu biti udruženja koja su odgovorna za realizaciju 1 ili više aktivnih projekata podržanih po prethodnim pozivima);
- **Nosilac projekta može biti formalno registrovano udruženje, mjesna zajednica ili ustanova unutar LGZR, ili neformalna grupa sačinjena od pojedinaca koji su članovi LGZR;**
- Neformalne grupe moraju imenovati 3 punoljetne osobe koje će preuzeti punu odgovornost za realizaciju projekta;
- **Projekti treba da pokažu vidljivu saradnju i podršku lokalnih partnera u zajednici (posebno lokalnih vlasti, ali i poslovnih subjekata, udruženja, pojedinaca, javnih institucija itd.). Poželjno je da aplikanti dostave potvrdu da će općina/grad i/ili drugi akteri sudjelovati u realizaciju projekta;**
- Prednost se daje projektima koji uključuju veći broj građana iz lokalne zajednice u realizaciju projekta;
- **Aplikanti mogu aplicirati samo sa jednim projektom na ovaj poziv;**
- **Učešće aplikanta mora iznositi najmanje 30% od potraživanog iznosa,** što podrazumjeva jasno iskazano učešće aplikanta u finansiranju projekta, u vidu uloženog novca ili uloženog volonterskog rada ili donirane robe, alata, opreme ili usluga bilo od strane aplikanta ili drugih lokalnih donatora. Vrijednost volonterskog rada i donacija u robi mora biti izražena u novčanim jedinicama i jasno opisana u aplikaciji;
- **Ne podržavamo projekte čija ukupna vrijednost prelazi 10.000,00KM;**
- U pravilu ne dodjeljujemo drugu donaciju za isti projekat osim u posebnim slučajevima kada komisija procijeni da projekat ima dugoročan efekat i da se njime rješava jedan od prioriternih problema u zajednici;
- Daje se prednost manjim organizacijama i aplikantima koji nikad nisu dobili grant od Fondacije;
- Daje se prednost organizacijama koje nemaju trenutno aktivan projekat podržan od strane Fondacije.

ŠTA NE MOŽEMO PODRŽATI?

Projekat se neće podržati ako se radi o sljedećim slučajevima:

- **projekte koji nisu delegirani i odobreni od strane Lokalne grupe za razvoj zajednice;**
- **projekte koji nisu dio akcionog plana zajednice;**
- u pravilu ne dodjeljujemo drugu donaciju za isti projekat osim u posebnim slučajevima kada komisija procijeni da projekat ima dugoročan efekat i da se njime rješava jedan od prioriternih problema u zajednici;
- lične koristi pojedinca;
- otplate dugova ili kredita;
- za projekte koji su već odrađeni ili se radi o retroaktivnim zahtjevima;
- godišnje finansiranje rada udruženja/grupe;
- projekte druženja članova neke grupe ili udruženja;
- isključivo troškove putovanja, smještaja, putarine, ekskurzija;
- troškove učešća na edukacijama za pojedince ili članove udruženja;
- **projekte čija ukupna vrijednost prelazi 10.000,00KM;**
- **isključivu nabavku opreme ili materijala,** osim u slučajevima kada se projekat ne može realizovati bez određene opreme/materijala i u tom slučaju iznos **potraživanja za opremu/materijal ne smije prelaziti 30% vrijednosti traženog granta** (neformalne grupe koje kroz projekat nabave opremu dužne su svu kupljenu opremu donirati lokalnoj organizaciji ili instituciji po završetku projekta);



(napomena: pod opremom/materijalom se podrazumijevaju svi artikli čiji vijek trajanja/upotrebe je duži od godine dana);

(izuzetak su projekti koji u svojim akcionim planovima imaju prioritetne nabavke određene opreme, i u tom slučaju Komisija može procijeniti i donijeti odluku o podršci nabavke opreme u iznosu većem od 30%)

- troškovi projekta ne mogu uključivati najam opreme od neregistrovane kompanije ili od strane fizičkih lica;
- organizacijske troškove čije potraživanje prelazi 20% vrijednosti traženog granta u slučaju kada je aplikant organizacija (Organizacijski troškovi podrazumijevaju naknadu za usluge koordiniranja projekta, troškove prevoza i druge režijske troškove koji glase na ime organizacije);
- troškove prevoza, goriva, telefona i troškove projektnog osoblja u slučaju kada je aplikant neformalna grupa ne možemo podržati, (Izuzetak je prevoz u slučaju da se radi o angažmanu prevoznika za realizaciju određene projektne aktivnosti);
- ne možemo podržati troškove rentanja vozila za prevoz;
- ne podržavamo projekte koji na bilo koji način štete okolišu, te u skladu s tim želimo skrenuti pažnju aplikantima da u realizaciji projektnih prijedloga vode računa da koriste biorazgradive materijale koji ne predstavljaju opasnost za okoliš i živi svijet;
- dodjele humanitarne pomoći ili dodjele donacije drugima kroz podržani projekat;
- ne možemo podržati regranting;
- ako je iznos vlastitog učešća u projektu, uključujući i volonterski rad manji od 30% u odnosu na vrijednost tražene donacije od strane Fondacije;
- za nabavku osnovnih sredstava rada;
- magistarske i doktorske radove;
- zahtjeve od velikih dobrotvornih društva (izuzev kada lokalni ogranak, koji ima odvojeni organ upravljanja, implementira nezavisnu aktivnost za dobrobit zajednice);
- za nabavku oružja (u bilo kojem obliku, bez obzira da li se radi o sportsko/rekreativnom, replikama i sli.)
- za projekte koji su primarno za unapređenje religije i politike;
- projekte političkih partija ili njihovih ogranaka;
- projekte vjerskih institucija ili organizacija;
- zahtjeve za sponzoriranje, reklamiranje, podrška događajima za namicanje sredstava i velike zahtjeve za sredstvima;
- redovne trenažne procese sportskih klubova i/ili putovanja;
- kotizacije i troškove takmičenja u ligama;
- plaćanje isključivo honorara za trenere ili druge osobe angažovane po projektu;
- projekte koji su primarno usmjereni na ostvarivanje profita;
- troškove isključive registracije novog udruženja, osim u slučaju kada neformalna grupa kroz realizaciju projekta želi osnovati novo udruženje;
- projekte koji promovišu nasilje, mržnju ili bilo koji vid diskriminacije;
- projekte koji u svojim aktivnostima imaju uređenja i renoviranja spomen obilježja, groblja i mezarja;
- kupovine alkoholnih pića;
- projekte koji traju duže od šest (5) mjeseci;
- projekte koji se realizuju izvan Tuzlanskog kantona.



KAKO APLICIRATI?

- Savjetujemo vam da unaprijed promislite o vašoj aplikaciji, te budete slobodni kontaktirati osoblje Fondacije ukoliko vam je potrebna podrška prilikom razrade ideje i/ili ispunjavanju online aplikacije na brojeve telefona 035 362-830 i 061/229-179 kontakt osoba ispred Fondacije je Melika Mulaosmanović, ili putem e-mail-a: inicijative@fondacijatz.org sa naznakom „Fond za aktivne zajednice“.
- Projektne aktivnosti možete planirati najranije 30 dana od zatvaranja roka na koji ste se prijavili, jer će Komisija za odabir projekata donijeti odluku u periodu od maksimalno 30 dana nakon zatvaranja svakog aplikacionog kruga;
- **Projektne prijedloge se dostavlja popunjavanjem [platforme za online apliciranje](#) koja se nalazi na web stranici Fondacije tuzlanske zajednice;**
- Potpisanu i ovjerenu dokumentaciju treba dostaviti poštom ili lično u kancelariju Fondacije tuzlanske zajednice, na adresu: Pozorišna br 13, 75000-Tuzla sa naznakom „Fond za aktivne zajednice- JAVNI POZIV 1-FAZ-1/2025“, u roku od 7 dana nakon potvrde grant tima da je zaprimljena elektronska verzija aplikacije;
- Registrovana udruženja trebaju **dostaviti rješenje o registraciji - samo za aplikante koji prvi puta apliciraju Fondaciji (kopija), statut Udruženja - samo za aplikante koji prvi puta apliciraju Fondaciji (kopija), finansijski izvještaj za prethodnu godinu (bilans stanja i bilans uspjeha-kopija), dokaz o otvorenom žiro računu u banci (kopija), i potpisanu i ovjerenu izjavu o partnerstvu, ako se radi o partnerskim projektima;**
- **Ukoliko se projekat realizuje u školi ili drugoj odgojno obrazovnoj ili javnoj ustanovi, aplikant je obavezan dostaviti odobrenje odgovornog lica za provedbu projekta u toj ustanovi;**
- Aplikanti su dužni omogućiti grant timu Fondacije da izvrši predgrantovsku procjenu rada i poslovanja organizacije u prethodnom periodu. Predgrantovska procjena podrazumijeva analizu organizacijskih, finansijskih, administrativnih i ljudskih resursa podnosioca projektnog prijedloga. Samo organizacije koje zadovolje proces predgrantovske procjene mogu dobiti novčanu podršku;
- Aplikacije se nakon toga prezentuju nezavisnoj građanskoj Komisiji za odabir projekata za podršku. Komisija će prilikom procjene projektne prijedloge ocjenjivati po sljedećim kriterijima: relevantnost u odnosu na teme poziva, relevantnost u odnosu na ciljne grupe, volontersko učešće građana i donatora, jačanje civilne organizacije i NVO sektora, te uticaj na vlasti i zajednicu;
- Svi aplikanti će biti pismeno obaviješteni o odluci Komisije, bez obzira da li je odobrena podrška ili ne;
- Neformalne grupe koje dobiju podršku svoj projekat će realizovati na način da će dobiti in-kind finansiranje projekta, koje podrazumijeva da će sve troškove nastale u toku trajanja projekta plaćati direktno Fondacija, a dužnost neformalne grupe je da pripremi predračune i račune te iste dostavi Fondaciji;
- Po finalnom odabiru projekata, i objavljivanju rezultata na web stranici Fondacije bit će otvoren rok za prigovore u trajanju od 7 radnih dana. Pravo na prigovor imaju svi sudionici na objavljenom pozivu koji iz određenih razloga nisu zadovoljni svojom pozicijom na rang listi odobrenih grantova.



POTPISIVANJE UGOVORA SA ODABRANIM APLIKANTIMA

- Aplikanti čiji projekti budu odabrani za podršku će potpisati Ugovor o dodjeli granta sa Fondacijom tuzlanske zajednice i tako postati korisnici grant sredstava.

Navedeni kriteriji su usklađeni sa ciljevima projekta "Jačanje civilnog društva i demokratske kulture u TK" i zahtjevima donatora Fonda.

U Tuzli, 05.03.2025.



Jasna Jašarević
Izvršna direktorica